

## ALAHADY faharoa PAKA - TAONA B



*« Ho aminareo anie ny fiadanana ! Tahaka ny nanirahan'ny Raiko  
Ahy no anirahako anareo koa » (Jo. 20: 21)*

Ry Kristianina havana, nandresy ny ratsy rehetra i Jesoa ary ny fahafatesana no faran-tampon'ny ratsy. Eo anivontsika nefa i Jesoa nandresy fa tsy hoe lavitra antsika, miara-miaina amintsika Izy ary indrindra mitondra ny ainy izay aim-baovaon'ny Paka ho antsika. Izany no tian'ireo vakiteny arosan'ny Eglizy amin'izao Alahady faharoa fankalazana ny Paka izao. Alahadin'ny famindrampo araka ny efa fantatsika. Mahery tokoa ny finoana ka mitondra fanantenana ary mamelona ny fitiavana mba hahafahantsika mivelona ny fiadanana

andrandrantsika, sy ny hasambarana tiantsika ho tanteraka ary izany no ambaran'i Jesoa isaky ny miseho izy rehefa tafatsangan-ko velona : *“Homba anareo anie ny fiadanana”*. Izany no fiarahaban'i Jesoa an'ireo mpianany isaky ny miseho Izy. Fiadanana tsy araky ny hevitr'izao tontolo izao izay

Vakiteny I : Asa. 4, 32-35

Tononkira : Salamo 117

Vakiteny II : 1 Jo. 5, 1-6

Evanjely : Jo. 20, 19-31

midika milamina ao anatin'ny tahotra sy ny heritsetra vokatry ny fitiavana sy fanangonan-karena na dia mifanapotika tanteraka aza dia mitady izay fomba hahazoana izany harena izany ka mieritreritra fa mahery izy ary rehefa mandresy dia mihevitra fa izany no fiadanana. Tsy izany no fiadanana ambaran'i Jesoa fa ilay fiadanana vokatry ny fandresena ny ratsy izay manapotika antsika dia ny fialonana ka mahatonga antsika manilikilika ny hafa. Mieritreritra

isika fa miadana rehefa manilika ny hafa, mihevitra fa mahavita tena samirery tsy mila ny hafa ka miavona sy manapotika ny hafa aza, ireny no heverintsika ho fiadanana. Toy izany koa ny fitiavan-tena, angonina izao rehetra izao, ny fiheverana fa ianao no tompon'ny fahefana sy ny hery rehetra izay no heverintsika fa fiadanana. Tadidintsika ny tenin'I Papa teny Soamandrakizay fa indrindra ireo tanora : “tsy misy afaka hilaza ny eo an-kilany tsy mila anao aho...”

Antitraterin'ireo vakiteny telo androany amintsika ny tena fiadanana. Ny vakiteny voalohany mitantara ny fiainan'ireo Apôstôly. Marina fa idealy izany ary mety tsy tanteraka fa ezaka tsy maintsy atao ary tsy ezaky ny tena fotsiny fa vokatry ny Fanahy Masina, vokatry ny famindrampon'Andriamanitra ka noho ny fiovan'ny fifandraisana amin'Andriamanitra sy ny fifandraisana samy olombelona ary ny fifandraisana amin'ny zava-boahary dia miray fo sy fanahy avokoa ny rehetra araka ny voalazan'ny vakiteny voalohany eto : *“Niray fo sy fanahy avokoa ny mpino rehetra; tsy nisy nilaza ny fananany hoe azy, fa niombonany daholo ny zavatra rehetra. Tamin-kery lehibe no nanamarinan'ny Apôstôly ny nitsanganan'i Jesoa Tompo ho velona, ary fahasoavana be no teo amin'izy rehetra.”* Izany no lalana mitondra amin'ny tena fiadanana satria tsy nisy nahantra tamin'izy ireo: *“tsy nisy mahantra teo amin'izy ireo, satria izay rehetra nanan-tany na trano, dia nivarotra azy ary nitondra ny vidin'izay lafo, ary nametraka azy teo an-tongotry ny Apôstôly, ka nozarazaraina tamin'izy rehetra araka izay nilainy avy.”* Nifampitsinjo sy nifankatia izy ireo, izany no fahaizana miombona bebe kokoa amin'Andriamanitra amin'ny mpiara-belona sy amin'ny zava-manan'aina rehetra. Raha fintinina dia mirindra sy milamina ny fifandraisana ka zary miaina ao anatin'ny fiadanan'I Kristy. Io ny tian'ny Hafatra Pastoraly faha-8 hivelomantsika ary ny annexe 3 izay eo am-pelatanantsika manoro ho an'ny fianakaviana “eglizy kely” fa izao Papa izao no maniraka antsika hifampitsimbina, hifanasoa. Io ihany koa no ambaran'ny Papa ao amin'ny Ansiklika “Fratelli Tutti” ho lalana mitondra amin'ny fampijoroana ny “Olo Araiky isika jiaby”

Idealy ny fomba fiainan'ireo Apôstôly ary mety ho modely ka anjarantsika ny manatanteraka azy eo amin'ny fiainantsika. Manamafy izany ny vakiteny faharoa nalaina tao amin'ny taratazin'i Md Joany ; rehefa nateraka ao amin'i Jesoa isika dia lasa olom-baovao : *“Ry malala, izay rehetra mino fa i Jesoa no Kristy, dia nateraka avy amin'Andriamanitra ; ary izay rehetra tia llay niteraka Azy, dia tia Azy naterany koa”.* Izany no mitondra fiovam-po tanteraka ka lasa zanak'Andriamanitra, olo araiky ao amin'Andriamanitra, Eglizy Olona Velona ao amin'Andriamanitra isika ka ny fototr'izany rehetra izany anefa dia ny finoana ary ny finoana no hahitantsika fa eo anivontsika tokoa i Jesoa. Fantantsika ny tantaran'i Md Tomà ao amin'ny Evanjely, tsy nino izy tamin'ny voalohany. Ny tsy finoana no mahatonga antsika tsy afaka mivelona marina tokoa ny batemy satria mbola feno fisalasalana tahaka an'i Md Tomà kanefa rehefa feno ny finoantsika dia dibon-kafaliana mandrakariva isika. Izany ny fiadanana na dia eo aza ireo fahasahiranana sy ny zava-manahirana dia mahita ny Tompo am-pinoana isika ka afaka miatrika ny fiainana tahaka an'ireo Apôstôly voalaza ao amin'ny Evanjely, nahita ny Tompo izy ireo. Tsy teo Tomà fa nibebaka izy nanambara hoe :*“Tompoko*

sy *Andriamanitra*”. Tafiditra lalina ao am-pon’i Tomà I Jesoa ka niova ny fiainany. Izany koa no antenaintsika amin’izao Paka izao izay nomanintsika ka nanaovantsika rehetra ezaka tamin’ny karemy sy nankalazaintsika nanomboka tamin’ny pelerinajy tany “la montagne de français”, ny lamesa krismaly nitondra antsika tamin’ny Herinandro masina ka nankalazaintsika ny Paka tamin’ny Alahady lasa teo ary izao dia mitohy ka miomana isika amin’ny fankalazana ny fetin’ny olontsambatra Lucien Botovasoa.

Izany rehetra izany hanampy antsika hahatsapa ny fiadanan’i Kristy raha misokatra tokoa ny masom-pinoantsika ka mahita azy eo anivon’ny fiainantsika. Amin’izay hanova ny fiainantsika isika ka hihatsara ny fifandraisantsika amin’Andriamanitra, ny fifandraisantsika samy zanaka. Ny famindram-pon’Andriamanitra no manenika ny fiainantsika, ny Fanahin’Andriamanitra no manentana ny fiainantsika ka ho zanak’Andriamanitra isika. Raha ny Famindram-pony sy ny Fanahiny no manentana antsika dia miova ny fifandraisantsika samy isika ka ho afaka amintsika ny fialonana sy ny avonavona ary ny fitiavan-tena manapotika antsika fa ho fiainam-baovao, ho fianakaviana iray isika, ho Eglizy Olona Velona isika miara mandalimpinoana, miara-mijoro ho vavolombelona mampanjaka ny rariny sy ny hitsiny, mampanjaka ny fihavanana marina fa indrindra amin’izao andro iainantsika izao izay maro ny zavatra mifamahofaho. Sambatra isika fa manana modely satria misy malagasy iray rà amintsika dia i Lucien Botovasoa nivelona ireo voalazantsika rehetra ireo satria nentanin’ny famindram-pon’Andriamanitra ka nasandratra ho Olontsambatra. Enga anie hitondra aim-baovao ho antsika ka zary Pantekôty vaovao andrandraintsika eto Madagasikara ny fankalazana ny fetin’io Olontsambatra io Enga anie ka ho tonga Eglizy Olona Velona tokoa isika miaraka Aminy. Izy hiara-hivavaka amintsika ka sady mpanorina ny Eglizy Tranon’Andriamanitra isika no mpanorina ny EOV. Hanana fahasahiana, fahafoizana, fandraisana an-tànana ary fitiavam-bavaka isika, ka ho Paka vaovao hitondra fiadanana ho antsika tokoa anie izao Paka ankalazaintsika izao. Ny famindram-pon’Andriamanitra anie hanenika ny fiainantsika. Amen

Mompera Arseveka Mgr Benjamin Ramaroson